



DECRETO EJECUTIVO 604





N° 604
GUILLERMO LASSO MENDOZA
EKUADORI MANTAMIN UNI

Ayanka pila manta 1, mi'kena'sa in Ekuadoritoka jerale i'to jun parejunan, jeralela jun mantakanan, jeralelanan pu'de intsan, uyanchinechi manta i'ton, dukekarin bolon l'to chunun to Joe tinae;

Ayanka pila Ekuadoribi nechi 3, Constitución de la República tsantinae Manta tanla junte rano joe kirato, mokananti yu'ka kuratuminan in pila jeralelachi manta tsantinae Constitución junshi bare tobi mantajuminla.

Ayanka pila Ekuadoribi nechi 3, jun mantabi joe 11 Constitución de la República junin in derecho Ayanka pila mantabi junshi bareto bi mantaminla piyanlelachi manta kiraminka junte tsantinae; juni inbi jayakeminla unila, sona, yala kiranolajoe junshi pila ereno lajoe in mantaminla pan akaka; inte tsantinae titi sele jono joe inbi manta pila panaminka dechi shuwatuminan junshi bu'tuse shupoletuminan.

Inbi mikena'to tsantinae 17 Ayanka pila mantabi juni inte tsantinae 57 Jeraleka in tobi sonraminka, komunabi chuminla, komunala, junshi tsa'chila kuwenta sonrano mi tanla manta talae juni yala kasele pan a'to meranolajoe titi manta tsanla ka lare'tumina yalachi sonrano mantaka niyakety yu'ka patarenojuna;

Ekuadori ayanka pilabi, 87 mikena'to i'tsanke panae, nun bolonti ya'chi tedebi tikati seken, manseshuwano, mantaka junshi niyake fi'ki panaminka ayanka pilabi junshi orachinechi pila pa'tanaminlaka, tsanlaka sele chuno pude ila i'sa juntsankenana komuna junshi uyan bolonlaka.

Ekuadori ayanka pilabi, ka'kele ramin 147 miken'to panae, inte toka ayanka mantamin uni kirano joe tina, junshi uyanlakanan jun parejunan ayanka pilabi tinaminkati kenola joeke, juntsankenana orachinechi pila fanaminlaka junshi uyan pilaka jun parejunan panaminlaka.

Ekuadori ayanka pilabi, 227 mikena'to intsanke panae, Mantamin unichi ko'tole raminla manta kuwato yala piyanlela tenchi titi keminlajoe seke sonrano podeilai'sa in titi kinakajunka jera postote fesakarinoje jeralebe tenpa'to, kuwenta ki'to junshi merato panaminlaka.

Ekuadori ayanka pilabi raé a) junshi 1 in mantabi raé 6 Convenio sobre Pueblos Indígenas y Tribales inbi manta joe, in pila manta junka merano, mantaminla paano lajoe tsa'chilabe, tsankenana tenkachi boloino junshi tsa'chi michi boloino junla, juni in mata joe;

Orachinechi bolon i'to pilakekajunbi chilaka i'sha pa'chun, 19 mikena'to, mantakena mantaminlaka yape tikati ke'chinato chilachi tobi ke'natorin pan a'to ka'ke kiralake'sa yape chilatala ka'ke kuwentake'to junshi tenpa'to sejonunka kirato sejoe ti'chun junshi keno pude i'chun nantarin niyananti i'tuchun.

Ayanka pilaka bolon pila larikala joe No. 028-19-IN/22, 19 ma jina'sa eneropete 2022 wa'tate, ya pila i'tsanke pan a'to kirano juminka panae: 1) junojoe tsa'chilaka, yalachi komunaka, junshi tsa'chila kuwenta bolon i'to chuminlachi, 2) te ka'kenan pan akaka junshi jelenka i'sha

Nº 604
GUILLERMO LASSO MENDOZA
EKUADORI MANTAMIN UNI

pa'chun pan a'to kiranakaka pala ke'tue; 3) fi'ki larikajun panojoe niyaketi se i'tonke pa'tinanunka bolon i'to chuminlachi.

Nun bolonlati manta pilalaka seshuawano pude iminlati pano pude ino i'tolajoe tsa'chilaka i'shapachun pila kekajun i'toeke; panshile tsajunarin Ayanka mantamin unichi tedebi rae in pilaka larino, in pila manta juno joe junbi panae niyakirake kenola jonunka pan a'to kirano jun jolalaka manta pila lari'tuminan mantala kuwenta.

Inbi panae manta kuwakalenechi titi kino podeinolajoe tsantinae inbi 141, mikena'to 5 junshi 13 ayanka pila Ekuadoribi manta 147, junshi in manta 11 in Estatuto de Régimen Jurídico jushin Administrativo de la Función Ejecutiva, i'tsaka panae.

**MANTA PILA TIKATI KECHINA'TO PAN A'TO KIRACHUN AYANKA MANTAMIN PILA
KA LARI'TUMINAN MATAMINLABI NECHI**

Capítulo I
Pila te'pa manka
TILE KENOJONUNKA JUNSHI KE'CHUN MANTA

In manta 1.- Ti'chun junshi tile kenojonunka.- In pila manta joe yarin niyakirake tikati kenojonunka pan a'to kirano jolale. In pilabi manta panaminka jerale mantamin bolonla manta ino lajoe tileti se ti'tuna Ekuadori ayanka pilabe parejun juntsankena orachinechi pila fanaminlabi tsa'chilaka, komuna junshi jerale tsa'chila kuwenta bolon i'to chuminlaka i'sha pa'chun.

In pan akajunka tileti keno pude ino jolajoe, nishi mantaminla jun minute man seshuwade jina'sati; yape Ekuadori ayanka pilabi 84 mikena'to tinaminka manta ino pude i'chun.

In Manta 2.- Inbi e' tonojoe.- In pan akajun manta neyanae junbi jeralela komunabi chuminla junshi chila kuwenta sonrano mi tanlabe kuwenta ki'to, tenpa'to junshi yala panamin fi'kika merato sele tu lo'to man fi'kirin tan puraikajun, in manta ka lo'tusana Ayanka mantamilabi nechi.

Nishi kasale pila panaka jo'sati, niyakirati pura ika jo'toti pan alakena'sa jera manta juno i'toe, juntsanjunarin mantaminla kirano pude ino jola joe ti pilakati se pa'tarichike kirachun, juntonan in minukanan jinojoe sele tikati pan a'to kirakajun.

In Manta 3.- Moka pan a'to kirano jun.- Ts'achila, komunala junshi uyan tsa'chila kuwenta bolon i'to chuminlamarin pan a'to kirano manta joe

Kira i'tuminla bolonlamarin te pan ano i'tolajoe, yalarin kira i'tuminla jo'torin 21 mikenun jinasa 57 mantabi panaminka kiranolajoe Ekuadori ayanka pilabi

In Manta 4.- Mo pan ano jun.- Manta tanla in minuka kiraminka manta talae pan a'to kirano. Niyake pan a'to kiranun pilaka ke'sa, Ayanka mantamin uni manta kuwano joe nun bolon in minuka kiraminkati in pila seshuwasa.

In Manta 5.- Tsanke tenka ka'to.- In pan a'to kirakajun i'tsanke tenka ka'to juno joe:

N° 604
GUILLERMO LASSO MENDOZA
EKUADORI MANTAMIN UNI

1. Seke ke'chun.- In pan a'to kirakajun ka tileti neyatuminan keno manta joe, e'perin wanbi uyankirake fi'ki kiraka i'chunaeke chilachi manta ino pude i'tusa chilaka, kumunalaka junshi tsa'chila kuwenta bolon i'to chuminlaka, in lakarin ka'sale sele fi'ki pulareno jolae.

2. Seke Tenkayajun .- In pan aka ma kuwajunka tena'to titi kenolajoe inbi fi'ki panaminka komunachi merawo'to.

3. Seke tenkabe ke'chun.- In pa'to kiraka jolate, mantaminla junshi tsa'chila, komunala, junshi tsa'chi kuwenta bolon i'to chuminla; parejulenán sele tenka ka'to keno jolajoe, junshi tsabe, nene pa'tuminan, uwanla kuwenta, tikati pe kirato keno jolae jerale tede po'to junshi jun parejunanla yoe ten i'to.

4. Jeralela man juni jo'chun kuwenta.- In pan akajun junojoe chilachi mika kirato junshi tsankena chilachi mantaka tenra'to.

5. Fi'ki pulari'chun.- Mantaminla tikati sele fi'ki pularino jolajoe tsa'chila, kumuna, junshi tsa'chila kuwenta bolon i'to chuminlachi, fi'ki pularina'to tenka tano jolajoe niyaketi junshi jeralela fi'kilaka kirato.

6. Tenka muna .- Junin komunabi chuminla, tsa'chila kuwenta sonrano mi tanla yalaka pan anolajoe junshi yala tenka mantanan junbi pe ranolajoe monanti dechi shuwano i'toe.

7. Seke pila tsoreto keno.- In pan a'to kirakajun jola, sele pila tsoreto junshi wan i'tumin kenojolajoe, juntonan mokananti uyankirake pa'tuminan. Wan ikajun junshi ma e'pe pulesakarikajun monanti pulesakarino i'toe.

In Manta 6.- I'tsan tinano joe in pan akajun pila komunalaka junshi jeralelaka.- Junin in pan akajunka seke tanji'chun, i'tsanke pila chunojoe:

1. In pan akajun komunalaka junshi jeralela chila kuwenta mi tanlaka pan achun sepa'tarenolajoe ayanka mantaminla pila manta ka lari'tusanan;

2. Junin in ayanka manta pila ka lo'tusanan ya proyecto pilaka merawonolajoe uyan postote chuminlachi tenkayajun paka fi'kika ka'to in mantaka fe sonba lare'chun:

3. In pan aka fi'ki komunalaka junshi chila kuwenta sonrano mi tanlaka pan akajun chi'kan joe, manan jeralelaka pan akajun junshi jelen tenchi manta pan akaju yala manka jolajoe chi'kankura; junshi,

N° 604
GUILLERMO LASSO MENDOZA
EKUADORI MANTAMIN UNI

4. Komunabi sonraminla, komunala aman chila tsa'chila kuwenta sonrano mi tanla pakajun fi'kika jera merato pilabi chu'tenolajoe, yala tsankena niyake tenkayajunka panolajoe junshi in fi'ki junoe tile yalachi sonrano mantaka sei'ton kenojuna ten i'to.

In manta 7.-Bolon i'to selareno.- Juni in mantami kiramín bolon pila kiminla yalachi tedebi rae pan ano in manta kinakajunka jera komunalaka junshi chila kuwenta sonrano mi tanlaka, man bolonri i'to kiranolajoe in manta larekajun bolonla tikati sele ki'to merawosa, inbi panae yala niyakenanti sei'toeke pano manta i'tolajoe junbi titi kekaka.

Juni tikati sele ke'chun in mantabi tsantinae 226, Ayanka manta pila Ekuadoribi, juni in tsantinae bareto tobi jeralelachi mantaka pe kiramín bolonla pe ralasa kirato in manta kiramín bolonlabe pe parejo sele manta larelake'sa jeralelatchi.

In manta 8, .-Fi'ki pulareno joe titi kikajunka Manta Kiramin Bolonlachi.- Juni manta lareka junka titi kenanunka jera seka tanojoe jeralelachi ka kirawo tuminan, in pilaka sele kinojoe manta kirano minlabe chudito junshi Manta Kiramin Bolonlabe, juni inla jera kiranolajoe junshi mi kuwanolajoe tileti panshile sei'ton kenojuna junshi sei'ton keno e'tonan komulaka, komunabi sonraminlaka aman tsankenan chila kuwenta mi tanlaka.

In manta 9.- In bolonla pe kirano la joe.- Sele kasele paano komunabi chuminlaka in pilaka kirato, juni in manta seke losa in pilaka pe kemin junoje chila tsa'chila kuwenta sonramilachi manta kirano min junbi ranoje.

Juni kasele pakajun manta kiramínla junshi jun kale ramínla, tanolajoe tedebi jera pila seka tanoje in titi keminla sele miralasa tile fekarin komuna jonunka junshi nunu chila tsa'chila kuwentalachi to jonunka.

In manta 10.- Nishi mi'ka jono jun.-Titi kekajun jera sepa'tarekajun aman paano joe komunalaka junshi chila tsa'chila kuwenta sonrano mi tanlaka jera merawono titi keka, nishi mi'ka jominka pakara kinojoe mantamin unichi ko'tole ramínla, sei'toke kiratuminan panshile uyankirake titi man kinojuna.

In manta 11- Pan a'to kiranun Jolala.- Paaka komunabi chuminlaka junshi tsa'chila kuwenta sonrano mi tanla, i'tsan jono joe:

1. Sepa'tarekajun;
2. Fi'ki polareka jun jeralaka:
3. Inte paano la joyoe; junshi.
4. Pila keka junka tenka kano junshi debi dono pan akaka komunalabi.

N° 604
GUILLERMO LASSO MENDOZA
EKUADORI MANTAMIN UNI

Junin inte joe paakajun komunabi, in pila tsantinae paanola joe jeralelabe ti kenakajun sele losa junshi tsa'fiki minla inte rano lajoe komunabi nechi, tsankena tsa'chila kuwenta mi tanla in te pe rano joe pila chu'teka jun, in mantamin Sistema Intercultural Bilingüe.

Pila te'pa II
SEPA'TAREKAJUN

In manta 12.- Mi juno moloka pan anojunka.-In manta pila fi'ki pulareka lenechi inbi panaminka 8 niyake titi kenojunka. Juntenechi pan anojoe komunalaka junshi tsa'chila kuwenta sonrano mi tanlaka komuna pilaka kirawosa mirachun nishi to talanunka, junin inka tsanke tulakareno joe chilachi mi tenchi kiramín manta tan junte pe ramin, tikati sei'ton ke'tuminan sele tanji'chun junshi uyan manta tanla pe kirano podeilai'sa, inlaka panshile pe munarana.

Panshile nu komuna junshi tsankena tsa'chila kuwenta sonrano mi tanla in pilaka kuwano pudei'tuto, yala pudeinolajoe pa ano jeralelaka fi'ki pulareno jolate manaman chudikajun, juni in pilabi chu'tenolajoe ti tenchi yalaka pe pan asatenjanunka junshi tile yalachi sonrano mantaka sei'ton kenojuna in pila manta kenamin.

Juni panshile in pila pukajun titi in pilabi pan anaminka sele chu'te kai'tona, dechi shuwanolajoe in pilaka.

Pila te'pa III
JERALELAKA FI'KI POLARENO JOLA

In manta 13.- Fi'ki polareno.- (10) Chunka ma taé, junte mitano joe komunalaka junshi tsa'chi kuwenta sonrano mi tabla yalabe paano lajoe tsankena pila chu'teno joe, junin inte jeralelaka paano joe juntsankena pila kirakeno, fi'ki polare nunchi, pila te'pa junka junshi wiyanla fi'ki polare nunse, in pila fi'ki sele losa.

In pila fi'ki polarenun jun tsankena polarenun joe tsa'chilachi mika kiramín mantabi jun tsankena wiyan manta postobi.

In manta 14.- Jeralelaka fi'ki polareno junshi jun dekelo jimin pila.- Mo in pilaka tanjimin duke sele tan jino joe pan ala ke'sa komunabi chuminlaka, juni in fi'ki seke junojoe jeralelachi, in fi'ki ranojoe:

1. In proyecto manta pan aka jono joe;
2. Fi'ki polareno komunabi; junshi,
3. Jolala pila niyake pan'ato kirano jonunka ka manta kuwenta puratuminan.

Juni in pila kikajun tsa'fikichi juno joe, komunalabi, juntsankena tsa'chila kuwenta sonrano tanla junbi jeralelana rano joe.

N° 604
GUILLERMO LASSO MENDOZA
EKUADORI MANTAMIN UNI
Pila Te'pa IV
PILA KEKAJUN JUNSHI PAAKAJUN

In manta 15.- Komuna tenpe kuwenta keno.- In pila kuwakalenechi in mantabi tsantinae 14, junin komunala, junshi tsa'chi kuwenta sonrano mi tanla yala tenka nolajoe junshi yalachi mantabi rae tenkano, mi tano tenchi, sonrano, juno, junte kuwenta keno joe

komuna tenpe junshi jeralelai'to manta larenolajoe in pila fi'ki merato, monanti pashuwatukajun yalatala komuna tenpe tenpalakesa.

Junin komunabi raminla paano podeinolajoe tsarshika in manta kirano minlabe sele josa junshi seke pila kelakesa, tsanke munajana.

In manta 16.- Pila Kika junka kanun.- Ma taé (20) palu chunka ma, junte ma mika taé in pila kuwa pokalenechi, in pila mantabi tsantinae 14, junin komunabi chuminla junshi tsa'chi mi tanla kuwenta junte in pilaka kano la joe yala fi'ki pakala: in pilaka kuwanolajoe pila te'pabi jun tsankenani wiyani fi'ki polarenunbi junshi jeralela kiranun fi'ki pularenun jolabi; palu de'kanle, pila jono joe, mumun chudikajunla jun bolon ino mate junshi jeralé i'to tenpakajun mate komunabi.

Pila te'pa V
TITI KEKA SELOKA JUNSHI PAANO JOLA DEBI

In manta 17.- In fi'ki kayajun junshi titi selo kajun.- In fi'ki titi kekajun junshi paakajun ma jerainushile yala (5) mante ma talaé ya pila fi'ki kayalenechi yalatala chudito kirano, in manta pilabi tsantiane 16 paano manta tan bolonla junshi chilachi manta tenchi kiramin kiramin junte pe ranojoe in pila kuwakajunka sele kirato junbi panaminka.

In manta 18.- Debi pila keka jun.- Pila seshuwaka lenechi, junin (5) mante ma taé jun pila layaka junka seshuwano, junte pila manka debi keno joe komunabi paakajun titi keka junka, jun pilabi chu'tekajono joe jerapakajunka; in pila pe tsono joe pan akajun pila te'pabi.

In debi pilaka manta tanla kinolajoe proyecto tenchi, jun tsankena in pilaka wepana man kuwapono joe paankajunka, in pila jera keka junka manta tanlachi kuwanolajoe, juni yala inka jera kirato tenka kanolajoe junshi sejunarin sejo eke panolajoe: in debi paaka jun joe komunalabi, jununbi in kasan manta lono joe.

MANTA KUWAKAJUN JERALELACHI:

N° 604
GUILLERMO LASSO MENDOZA
EKUADORI MANTAMIN UNI

Juni panshile komunala junshi komunabi chuminla aman chila tsa'chila kuwenta sonrano mi tanla yala tenkayajunka junshi pakajunka pilabi chu'teto pularelake'tuna inla fi'ki pulareka josana yalachi muna junojoe, in proyecto telaino e'toe junte yarin jinonan joe.

Juni inbi tsantinae mo in manta tu'ka jumin pan ano komulaka yala pila kenolajoe junshi junbi chu'tenolaje panshile komunala junshi komunabi sonraminla aman chila tsa'chila kuwenta mi tanta pe layai'tulajoeke tenpabi.

MANTA JUN PILA

KA'KE.-In proyectola manta kenaka junshi titi kenakajun jeralachi kirawochun inka sepa'tarelakenae seke sonba kare'chun, in titi kenaka telanolajoe in pan akajun ma jeraino fekarin. Jun tsan i'tona in pakajunbi karainolajoe, in manta pila kinaminka ka manta kuwatuminan.


PALU.- Inte (20) palu chunka ma taé, Secretaría de Gestión y Desarrollo de Pueblos y Nacionalidades moti junbi rasa, inte jera kuwapono joe jun tsankena Función Ejecutiva jun fi'ki polare nunse komunabi chuminlachi junshi tsa'chi mi tanun kuwenta lachi. Man seka jun pila.

PEMAN.- Juni in manta tanla Función Ejecutiva inbi chu'tenolajoe nishi kala muramin jonunka i'tsan proyectola ki'chun, tsanke mirano jolaje nishi munaramin jona i'tsanke proyectola kina'to komulakabi junshi chila tsa'chila kuwenta mi tanlachi tobi.


DEBI MANTA


In manta pila kekajun ranojoe inbi fi'ki pularekajun Registro Oficial.

In pilaka 28 ma jina'sa noviembre Pete 2022 wa'tate larikajoe mantamin uni chumin yabinechi inte Te'tote.



REFORMA AL REGLAMENTO
AL CÓDIGO ORGÁNICO DEL AMBIENTE





N° XX

GUILLERMO LASSO MENDOZA

EKUADORI TOKA MANTAMIN UNI

I'TSANTINAE:

Ayanka pila Ekuadoribi nechi 7 jolale 3 mikená'to, panae Ecuadori mantamilachi manta joe: "(...) 7. I'sha pano in tobi jelenla jokaka junshi Chilachi mi juminlaka, jeralelachi juna (...)

Ayanka pila Ekuadoribi nechi 14 mikená'to panae: "(...) in manta jeralelachi joe sele chuno aman man chunin rakajun chilachi jelen ke'tsabi in jelen wu erenaminchi ora sele ja'sa ka'to, junin to Ayan chilachi jera a'no finola kuwaminjoe juntechí sele kirato tanolajoyoe seke sonra'chun jeralelana. Tsanke juna jeralela tenka ka'to duke wirutinolajoyoe chilachi jelenlaka i'shapa'to morin sei'ton kishinaminka tsanke wiruti'to jelenka tanolajoyoe, to sele talatukajun tsominka ka'to junbi jelen man shuwantsan joe (...);

Ayanka pila Ekuadoribi nechi 71 mikená'to panae, Tsankenán manta kuwakajoe chilachi To Ayanchi: "(...) Junin To Ayan tsankená sonraaminjoe titi pele ná'kala kuwato makura, chunun jola kuwato jeralelachi juntechí piyanlelachi manta joe chilachi To Ayanka orara sele kirato tano, ka'san nala wainaminlachi sen to junshi jelen purai'sa sele sonrano podeilai'sa (...);

Ayanka manta pila Ekuadoribi nechi 73 mikená'to: "(...) Juna in Mantabi tsantinae panshile morin titi sei'tonke talalakinana jelenbi pelelaka tole nin kinana, pi labi sei'ton veneno folalakinan aman tsankenán chí'tela chuminlaka poletole to'telakenán. Ekuadoribi manta pila tsantinae jelenlaka isha pa'to talasa junka meratuna uyantalake fe sonba wiritunojoe jelenka yu'kapiyare'tusa inbi manta panaminka kirato (...);

Ayanka manta pila Ekuadoribi nechi 6 jolale 83 mikená'to panae Ekuadoribi chuminla sonala, unila, nala, jeralelachi manta joe sele kirato tano chilachi sonrano To

Ayanka: "(...) 6. Yu'kapiyare'tuminan manta juminka tenka ka'to sele chilachi jelen tochi mantaka ishapa'to tanolajoyoe seke sonrano podei'chin, jun tsankená tikati junbi juminka sele talato tenkabe jonolerin nufirinka kirato (...);

Ayanka manta pila Ekuadoribi nechi 226 mikená'to panae: " (...) Jerale jayanun posto mantamin unichi ko'tole raminla tsankenán jun benele manta juminla,

aman jeralela in matabi jayakeminla sonala junshi unila titi kenolajoe in ayanka pila manta niyen tina nunka kirato. Junin inla man layainin i'to tenpa'to selarenolajoe in manta pila junka sele kirato (...);

Ayanka manta pila Ekuadoribi nechi 227 mikena'to panae: "Mantami uni mantaka jun jayakiminla, junin inla jeralelaka kiramimla joe sele titi kikajun selare'chun, orake tenka ka'to, piyanlelachi titi ke'chike kirato, jeralela man bolorin i'to laya i'to ten'pakajun jeralela min jolajo'sa, titi kinaka jun seke losa jun wanbi man chudito kirachun.";

Ayanka manta pila Ekuadoribi nechi 4 jolale 276 mikena'to tikati selare'chun: "(...) Junin 4 in manta joe sele kirato tano chilachi sonrano jelen postoka jeralela i'to, i'tsanke layai'to kirato ta'to sen pi, sen ja'sa wu aman sen to ta'chun, to ayan titi kuwanaminka sele talakino (...);

Ayanka manta pila Ekuadoribi nechi, in bi tsankinae 395le: "(...) Junin in 1. Manka Ekuadoribi manta tanla yala tsantilatinae duke selare'chun, jelenlaka sele kirato tanolajoyoe jun tsankena chilachi mi tanoka munati'to tano jolajoyoe sele chuno podei'chun, tsanke sele kirato ta'to chilachi jelenlaka man sen shuwato sonba lare'chun tsainan nala juminlachi junshi kasan wainamin nalachi sen jelen purai'sa. 2. Junin jelen kiramila manta tanla duke neka man minu, man minu neyato selarenolajoe in manta joe Ekuadori manta tanlachi junshi jelarelachi in tobi chuminlachi. 3 Ekuadoribi manta tanla jeralelaka bolon shuwato tenpanolajoe komunalabi, junshi chila tsa'chila kuwenta sonrano mi tanlabe, jelenlaka i'shapamin bolonla inbi pe ranolajoe tenpa'chun junshi sele tu lo'to in mantaka selare'chun. 4. Panshile in mantabi pila chu'tekajun sele meraja'tunan, pila manka joe inka sele tu lo'to jelenka i'shapa'chun.";

Ayanka manta pila Ekuadoribi nechi, in bi tsantinae 398: "(...) Mantami uni manta kuwakajun panshile jelenlaka yu'kapi yareno pa'tinan, pan ano jolajoe jeralelaka junshi kasele merakarenajoe sele miralasa. Manta tanla pan ano joe jeralela in Ekuadori to bi chuminlaka. In pila pan anojoe jeralelaka niyen kirake merajanunka jun tsankena ma puno jolajoe, nulabe pan anolajoe in pila selosa. Mantamin uni merano joe jeralela in to bi chuminlaka tsanke tinae in manta pilabi, juntsankena merano joe baretobi jeralela tenchi manta kiramim bolon paka junka. In pila kika fi'ki seke kika e'tonan jeralelanan pano pode ino la joe in proyectoka man selare'chun junin i'tsanke pano podeinola joe bolon i'to tenpa'to in manta jun pilaka kirato";

In bi tsantinae 7 Acuerdo Regional sobre el Acceso a la Información, Jeralelachi manta joe tileti pa'to pe nenano manta juminlaka selare'chun, junshi jelen manta tan jun joe América Latina tobi jun tsankena Karibe binechi, in bi kuwenta kekalajoe Escazú, junte kuwenta ki'to tsantikajoe jeralelachi manta joe tenpano titi selare'chun.

In bi tsantinae, Ka'ke 10 junte raé Manta kuwakajun Pi, Jelenka seke tano, junshi mili nue patsa nue chunka palu tsantinae Jelenlaka selare'chun jeralela layai'to kuwenta kinola joyoe junshi tenpakajun, in Escazúbi kuwenta kikajun fi'kika ne tan ji'to Acuerdo Regional sobre el Acceso a la Información, la Participación Pública y el Acceso a la Justicia en Asuntos Ambientales en América Latina junshi karibe to bi, junin inbi sonba shuwakalajoe in pila manta junka, junshi i'shapano pode i'chun jelenlaka sen to bi sonrano podei'chun;

In manta bi tsantinae, 82 Ley Orgánica de Participación Ciudadana junbi joe: "Paano jolajoe komunalaka jelen tenchi.- Juni titi kenojun Manta tanla pakajun panshile komunabi chumilachi jelen postoka yu'kapiyareno pa'tina pan anolajoe kasele komunalaka miralasa. Junin i'tsanke jera pan anojoe Ekuadori Manta tanla.

Ekuadori Manta tanla meranolajoe komunabi chuminla fi'ki pakajunka junshi tsankena Ayanka manta jun pilaka kiranolajoe aman bare tobi jeralelachi manta kiramin bolon, junshi wiyan manta pilaka meranola joe.";

In manta bi tsantinae, 83 Ley Orgánica de Participación Ciudadana junbi tsantinae: "In pila kika fi'kika seke kika e'tonan jeralelanan pano pode ino la joe, in proyectoka man selare'chun i'tsanke pano podeinola joe bolon i'to tenpa'to in manta jun pilaka kirato"; juni in proyecto sejunan orara tenka ka'to in mantaka sepa'tarenolajoyoe chilachi jeralelachi komunabi chuminlachi jelenka nanta talatuminan titi kelakesa, junin in proyecto joe jelenka yu'kapiyare'tuminan titi ke'chun sele sonrano pudei'chun chuno postote.";

In manta bi tsantinae, 184 Código Orgánico del Ambiente junbi tsantinae: "(...) Jelen kirami manta tanla in la talae pano panshile proyecto selo'tuna junshi jelenlaka yu'ka piyareno jun tala junan. I'tsanke jeralela layai'to tenpakajun duke selarino joe chilachi jelenlaka, jeralelachi fi'ki pakajunka layato in pilabi pe chu'tekajun. In proyectoka munatlati'tunan jeralela bolon i'to pila kino lajoe jelen kiramin manta tanlabe laya i'to. In pilaka sepa'tarechun jun kelole pe ranojoe jelen kirano minla, in pilalaka sepa'tarede jilai'sa, in bi rano la joe Sistema Único de Información Ambiental.";

In manta pila bi tsantinae, in Decreto Ejecutivo N°. 59, inbi joe Registro Oficial

Suplemento 478 de 22 de junio palu mili palu man wa'ta, tsankena in 2 junin inbi tsantinae in bareto bi Escazúbi tenpakajun mantaka ka'to sonba shuwano lajoe 3

In manta tsantinae jerala min jonolajoe jelen fi'ki kuwenta kinakajunka;

In manta pila bi tsantinae, N°. 142 Manta pila loka N°. 22-18-in/21, in pila Corte

Constitucional Ekuadoribi nechi tsantinae: "Manta tanla sele fi'ki pulareno jolajoe jeralelachi in mantaka miralasa junshi tenka ka'to kiralakesa niyake se e'tonke pa'tareno junka chilachi jelen toka. In fi'ki sele feno joe.";

In manta pila bi tsantinae, In manta loka N°.22-18-IN/21, 8 de septiembre palu mili palu manka wa'tate, tsankena in Corte Constitucional Ekuadoribi nechi panae: "5.

Junin inte 184 Código Orgánico del Ambiente in manta tsantinae wi'to kiratuminjoe juntona tsankena dechi shuwatue titi pan anojonunka komunalabi; in mantari chilachi jelenlaka son ta'chu sonba tinae, manta joe Kortebi tsankenanan man Acuerdo de Escazú junin in pila sen joe selare'chun.";

In manta pila bi tsantinae, N°.22-18-IN/21, 8 de septiembre palu mili palu chunka man wa'ta tsankena in Corte Constitucional Ekuadoribi nechi tsantinae: "7. Inte tsantinae manta juminka meratulajunan, in pila manta junlabi 462 junshi 463 RCOAM. Mantano jolayoe mantami uni man selarisa inbi manta pila lokajunka:";

In manta pila bi tsantinae, N° 1149-19-JP-/21, 10 de noviembre palu mili palu chunka manka wa'ta, Corte Constitucional Ekuadori tobi nechi, junte 274 tsantinae: "Jelen kiramini manta tanla pan anolajoe jerale bolonlaka komunabi chuminlaka: In bi tsantinae 398 piyanlela jelenka sele kirano manta talae "komulakura".

Komunala duke sele kiranolajoe junshi fe'tola jerale in manta joe jelenka i'shapachun.

In manta pila bi tsantinae, N° 1149-19-JP-/21, 10 de noviembre palu mili palu chunka man wa'ta, Corte Constitucional Ekuadori tobi nechi, junte 275 tsantinae: "Komunabi chuminla junshi komuna orachi chuminlaka, pan ano podei'chun, inla nishi wi'ta tsa'kumin pila e'tosanan pudeinolajoe inbi tempano jelenka selari'chun, "junin ti niyen inanti manta tanlachi tede bi rae jelenka sele kirato titi keno.";

In manta pila bi tsantinae, N° 1149-19-JP-/21, 10 de noviembre palu mili palu manka wa'ta, ekuadori ayanka pilalaka merasakarimin bolon inbi 289 tsantinae: "Junin jelen manta tenchi sele jeralete fi'ki pulareno jolajoe komunalabi. Inka pan a'to kirano jolajoe jelenlachi manta tenchi, tsankena fi'kika jeralelachi pularenojoe yape min jolajo'sa tsanke panae inbi 398 in ayanka pila manta ekuadoribi nechi, junin in manta tanla komunalachi sele fi'kika merawono jolajoe jeralelachi.";

Ayanka manta pila Ekuadoribi nechi, Ekuadori ayanka manta pilaka merasakaremin bolon in te tsantinae 340, in te mikuwanae: "In debi joe jelen fi'ki tenchi.- In fi'ki pan anolajoe jelen tenchi junin tsanke kirano talayoe: (i) In pan a'to kirakajun jeralelanan mirano jolajoe tsarshika jelenlachi manta juminka. Panshile jelenka yu'ka piyarelakina, junin Mantamila pan a'to kiranojoe komunabi chuminlabe.

(ii) In pan a'to kirano manta joe mantamin lachi jun tsankenanan in labe parejo pe nenanolajoe kirato jeralelaka i'shapamin bolon junshi manto tobi manta tanla. Uyan manta tanla wi'to kirano e'tolajoe in minu jinanunse. (iii) Tseban shukaka larebi wiminla kajo'sanan pan a'to kiranola joe jun posto kelote chuminlaka, tsankena pila tanola joe in tseban shukalaka lare'chun jun e'toto nati pode ino e'toe lareno, b) tsanke panae inbi 89 junin in manta joe, kaju'sanan "pila tanolajoe tseban shukalaka lare'chu", (iv) Pan a'to kirano kasele junshi jeralachi fi'ki pulareno sele tanji'chun in manta pila kenanunka (v)Junin mantaminla pan a'tuminan yalachi tenka munaka manta lareminlajoe, (vi) Juni manta joe jelenka

i'shapano manta tanla sada poletu jilai'tusa juntechi kasele pan a'to kirano jolajoe yape jelenka yu'ka piyare'tusa.

Ayanka manta pila Ekuadoribi nechi, in Decreto Ejecutivo N° 468, in Registro Oficial Suplemento N° 111 del 22 de julio de 2022, Ekudoribi mantamin uni manta kuwakajoe Jelen kiraminklachi, Pi junshi To ayan Ministerio, Lu shili kirami Tseban shuka lareminla in Ministerio joe junshi Mantamin Unichi Ko'tole Pila Chu'teka'to Ramin Bolonla Ekuadori tobi, proyecto kiminla joe in Manta rae Código Orgánico del Ambiente junin in mantala tu'ka ranolajoe in pan akajun komulaka yala in minuka tu'ka i'to jelenla tenchi fi'ki pularenolajoe; junshi,

In pilabi manta joe juni inte tsantiinae 13 jun tsankena inbi 147 Ayanka manta pila Ekuadoribi junshi 129 Código Orgánico Administrativo junte i'tsanke manta panae:

KASANLE NECHI MAN TENKANO PILA MANTA JELENKA KIRAMINKA

Inte joe. 1.- Waladanojoe d) 429, man manta tenchi:

“d) Pila ki'to fi'ki polareno joe ya niyake jinanun junte nechi jeralala bolon i'to tsankena pan anolajoe jelen tenchi, proyecto kirato ya titi kelakinnan, polenkarin yu'ka piyare'tuminla jelenlaka junte joe lu shili kiramink junshi tseban shula laremin, inlaka manta minlajoe Jelen Kiraminla manta tanla; junshi,”.

Inte joe 2.- Waladanojoe 440, man manta tenchi :

“Inte joe. 440.- Juni inbi tu'ka ranojoe pan a'to junshi fi'ki pulare'to jeralala mira'chun jelen manta tenchi. Jelen Manta Kiramin Bolonla, Ekuadori provinshalabi kura manta tanla, juni in jamobi ramin manta kuwamin joe Jelen Manta Kiramin Bolon, in bolon shuwamin joe pan a'chun jelen manta tenchi pila bi panakajunka kirato.

Panshile jerale bolon i'to in pan a'ka jun fi'ki jelenchi manta tenchi jeralalai'to setilati'tuna in proyectoka seke i'tona debi manta tae Jelen Manta kiramin Bolonla yala miranolajoe titi kebi wisa manta kuwano jununka junshi kuwano i'tona”.

Inte joe. 3.-Waladanojoe 441, man manta tenchi:

“Inte joe. 441.- Jelenka jeralala i'to kiranojolojoe.

- In fi'ki joe jeralala jelen tenchi paano titi kino jona proyectoka kirato tile fe sen junan in selosa, junin kasele pila tano joe jelenka kirade ji'chun; jun tsankenan kirakajun nanta yu'kapiyare'tusa toka in tseban shuka lareminla, ka'kebi pila tanolajoe manta kuwakajun jelenbi wino podei'sa, in manta panamika kirato III tsaina jun manta pilaka”.

Inte joe. 4.- Waladano joe inka III “PAN A'TO KIRAKAJUNKA” IN PEMAN TE'PABI, tsantinae:

KENO III

JELEN TENCHI JERALELA PE TENPANO JOLA JOYOE KASELE PAN A'TO KIRANO NIYAKE SEPA TAREDE JINO JONUNKA IN JELENCHI MANTALAKA

MAN TE'PA

TILE, NIYA I'TO, TI'CHUN JUNSHI TITI KENO JOLA JERALELAKA PAN A'TO KIRANO JELENTENCHI I'SHA PA'CHUN

Ayanka manta pila Ekuadoribi inte. 462.-Junin inbi panae seke kuwenta ki'to aman sele fi'ki pularenolajoe jeralela i'to tenpa'chun, Ekuadori Manta tanlabe junshi Jelen Manta kiraminalabe inla pan anolajoe komunabi chuminla jeralelaka, juni i'tsanke sele merawo'to tikati proyectoro juminlaka seke kinolajoe junto mirano pudeinolajoe jeralelana panshile in proyectoro kenaka jelenka yu'piyareno juna junshi ke'tsa tsanshirin talano jonunka jera miranolajoyoe, tsankena wiyano proyectoro jolajoe jelenka nanta yu'kapiyare'tuminan titi keminla juni inla joe lu shili kiraminala aman tseban shuka lareminla, juni in manta tenchi pan aminla sele fi'ki pulareno jolajoe in pila kenaka niyake pananunka merawokajun juntsankena pakajun panshile chilachi komuna chunun postote niyake ti see'ton keno juna, komunabi chuminla merakarenolajoe manta tanlabe uyankirake selari'chun in manta pilaka.

Tsankena, manta tanla pan a'to kiraminala komunabi chuminla fi'ki pakajunka jera layanojoe jun tsankenan yala pakajunka fi'kika pila chu'kekanojoe nu fe seke juna jelenchi manta tenchi panaminka, tsankena tenranolajoe nun minu fe sen jonunka kala titi mi'chi ino junka kiraro.

Junin jeralelachi in fi'kika sele pulareka lenechi aman pan a'to kiranolajoe komunabi chuminlaka jun jera sele pan a'tobi, jelen minu titi kebi wisa manta ka kuatuminan i'tsanke ka'ke pan anojoe, yape titi kebi wino podeilai'sa jelen postobi tsankena mirano podei'chun panshile titi yu'ka piyarenojuna.

Ayanka manta pila Ekuadoribi inte. 463.-In mata joe jera manta tan postobi jayaminla meranolajoe junshi tenranolajoe niyake jelenlachi manta panaminka, jun tsankenan titi proyectoro jayaminla tsankenan tenkabe talakinolajoe toka nanta yu'kapiyare'tuminan, tseban shuka neyaminlanan juntsankenan duke tenkabe titi kenolajoe nanta we'karetuminan.

Ayanka manta pila Ekuadoribi inte. 464- Kasele.- Jeralela bolon inolajoe junshi parejo pe ranolajoe in manta jumika pe kirato chilachi to ayanka yu'kapiyarelake'tusa, junin inla jeraka kirato in proyectoro kinolajoe chilachi mi jonoka junshi mokananti dechi shuwatu'to jeralela tenchi selare'chun.

Ayanka manta pila Ekuadoribi inte. 465.- Ti'chun jun.- in pilaka sepa'tarekajun jeralela pe ranolajoe sele mijo'chun juntobi pan akajun, junin in ka'ke joe:

- 1.- *Jeralela kumunalabi chuminlaka sele kirano pude i'lasa tikati se lari'chun jelenka i'shapano junshi panshile jelenbi tikati purepobi aman moso shukalaka larichike kirana'torin seke pan a'to tsankelake'sa; ya manta in pilabi chunojoe nishi ayanka pilabinan jun parejunan chunati.*
- 2.-*Jola larichun joe, chila junshi mantamin jelenka kiraminalabe, jun jolabi kirawochun chilachi tenkaka, dukekarin ten pa'to in pila jelenka i'sha panunlaka; jun tsankenana ka'san pila tenkachun i'tsanke jelenbinechi tikati laribi winaminlachi*
3. *Jeralechi fi'kilaka layato pilabi chu'tekajun junshi chudito kiranolajoe komunabi chuminla fi'ki pakajunka, in fi'ki pularekajun jeralelachi junin in joe jelen tenchi ishapanun pila, jun tsankenana ka'san pila tenkachun i'tsanke jelenbinechi tikati laribi winaminlachi.*
4. *Pan aka jun jeralela komunabi chuminlaka mirano podei'chun tikati yu'kapiyareno jonunka, jun sele mi jotobi aman jelen mantaminla manta kuwalakesa.*

Ayanka manta pila Ekuadoribi inte.466.- Tsanke juno joe.- *Jelenlaka i'sha pa'chun pan a'to kirano jun pila tsanke juno joe:*

JELENIKA YU'KAPIYAREMIN: I'tsanke jelenlaka yu'kapiyareminla joe, jelenbi chidela chuminka ushinana, wi'ta kina'to, duke fe'tola seralainana junshi tseban shukalaka larena'to junin i'tsanke puletusa ten janasati tsanke puleminjoe, wiyante kala ke'chike toka jera yu'kapiyarede jilainae.

YU'KAPIREMIN: Jelenka sei'ton shuwamin.

JUNTELE KENOJUN JOLA: In juntele kenojun jola joe titi proyectoro tsanla kenakajun aman toka we'karekajun wa ya tsanla ki'to, junin i'tsanke fe'tola junshi jerale titi kepuranin kinana duke sei'ton kiminjoe chilachi jelen toka, junin inka tsarshika jelen manta kiraminala tenka'to proyectoro tsanla kenolajoe jelenka nanta talatuminan titi selarelakesa.

INTE KENOJUN JOLA.- Junin inte jerale laya i'to tenpanolajoe tikati selareno jerale in tobi sonraminla tenchi, manka manka tenka'to junshi sele kirakajun jelenka ishapa'to junshi jelen mantaminla manta pilaka kuwakajun be wirutino podeinolajoe titi kenojun postote poletole tikati kelake'tusa, in proyectoro keno lominjoe tileti wiyante ya kelolate, kumunalabi, wi'ta minu tileti tsa'kumin tan tolabi junshi chilachi to junmanta tsa'chila kuwenta chuminla junshi mantaminla kuwapokajunla. Tsankenana kiranolaje tikati jelenbi juminka yu'kapiye'tusa.

Inte tsantinae to mantobi juminla junshi kumunalachi manta kuwaka e'tona mantaminla, junte kuwenta keno joe komunabi manta tanlabe jun tsankenana wiyana manta tanlabe layai'to. Junin pila manka joe jelenka kirachun ya proyectoro joe titi keno separatede ji'chun jelen manta kiraminalabe.

JUNTE KENOJUN JOLAJE SEI'TON PA'TINA.-Inte jolajoe fe'to bolonla proyectoro kiraminala tenpaminla-tokura tile in jino juna: parrokialabi, mantobi jun tsankenana provinshialabi. Junin inbi panae to ayanchi manta kirachun.

JUN SE'ETON KILAKINANAN KOMUNA-KOMUNALABI: Inte jeralela bolon i'to in tobi chuminla, junte kirano jolajoe jelen tenchi junshi yala chunun postote nanta yu'kapiyare'tusa in mantala.

PAN A'KA JUNLA.- Komuna, komunalabi jun tsankena fe'tolana, inte panae jelenka yu'kapiyarena. Junte manta joe pa'ano komunakura ya in proyecto chilachi to, jelenka yu'ka piyareno e'tona juntechi tsa'chila bolon i'to ka'kebi ranolajoe.

Juntsankena kirano talae komunabi raminla, mantote chuminla jelen tenchi ishapa'chu, inbi kirano talane jera bolon i'to, Ayanka Manta titi joe, "ishapa'chu jelenka" komunalabi.

Tsankena, jeralelanan bolon ino lajoe titi se'etoke jinanana jelenka yu'kaperono tilatinanan junte nula pore pa'tinolajoe pilachi kirawoto ya jelenka yu'kaperenan loba ora josana ju malate.

JERALELAKA PAN A'TO KIRAKAJUN.- In mantaka merawonasa jeralechi tsankenan uyan fe'tola komunabi chu'tumila pila puno podeinolajoe manta tanlachi tikati sele tenjatunan junshi yalachi kelole posto juminka yu'kapiyarela ke'chin ten i'to. Jun tsanke pila pukajunka jelen kiramina manta tanla chudito in fi'kika pe meranojola joe.

JELENLACHI MANTA MERAWONO.- Inbi panae jeralela kirano joe jelenlachi mantaka selare'chun junshi kirakajun fe sele tu lo'chun. I'tsanke pe junbi nena'to miranolaje in manta fi'kila, jun jera tenpatobi aman manta kuwano podeinojoe titi proyecto juminka jayakebi wilai'sa.

In fi'ki pularekajun jeralete merawono joe junshi sele entendeisakirikajun fe'tola, tsa'chila junshi jeralela sele miralasa. Juni in fi'kika pularenolajoe jeralelachi komunabi chumilachi junshi jeralela inte chumin laka pan anolajoe in pila mantaka selare'chun.

JELENTENCHI PAANO.- Kuwenta keno junte jino jolajoe junshi man jan komunalabi, tsanke komunalabi chuminlaka paano lajoe in proyecto tenchi sen juna titi kilakinasa jun tsankena se e'tona tsankena man fi'ki polareno lajoe, junte nulachi manta pe joe junin bolon i'to sejoe jelenka kirachun, inbi rala jelenka kiramina yala duke min lajoe inka selare'chun aman manta manka joe paanolajoe nulaka.

NULAKA PAANOLAJOE.- Jelenka Manta tanla pe kirano jolajoe.

JELEN MANTA TANLA.- Interae Jelenla tenchi Manta kiramina Ekuadori Tobi, tsankena provinshakura manta tanlan, yala inbi rano lajoe pe kirato Jelen Manta fi'ki Kiramina (SUMA), junin inte tsantinae in manta tae paano Jeralelaka jelenchi manta tenchi, in manta pakajunka kirato.

JELEN KIRAMINA.- Sona junshi Unila jelen kirano min junte ranojoe Manta minlabe yala bolon shuwamin jono jolajoe tenpa'chun, kuwenta ki'chun, pila chu'techun ya ti kinaka junka jeralela i'to te'pachun jelen tenchi, in mantabi tsanke panae.

JELEN MANTA TENCHI TITI KINO JERALELA BOLON I'TO PAANO JOLAJOE.- In pila kirano joe proyectoka ti sekinakajunka serale'chun jun tsankena seke ki'tuna, titi yu'kapiyareno juna jelenka kajosana selarechun, ya in proyecto tsanke joe. Junin inbi panae jerala bolon i'to kirana sen joe; i'tsanke panae:

1. *Jelenka kirakajun sei'tonke talake'tusa;*
2. *Sele mi juno; junshi,*
3. *Pila manka tanjino jolajoe in proyectobi jelen tenchi, titi kinakajunka kirachun junte joe polenkari yu'kapiyare'tumin jelenka talakebi wilai'sa.*

PANO JUNSHI KIRANO NIAKE FE SELE TENJINO JONUNKA KA'LA KE'CHUN.-

Junin inbi tsantinae sele tanji'chun in proyecto juminla nanta talatuminan jelenlaka juntuonan jeralela i'to kirakajun junshi fe sele minu kirato chilachi jelenka yu'kapiyaretu'chun. Inbi fi'ki pakajun jelen manta kiraminda chu'teno lajoe junin in pakajun jelen manta pilabi ranoje, proyecto kiraminda tedebe purainae in manta pila chu'tekajunka sele tanjisa.

PAKAJUNKA JUNSHI WIRUTINO CHILA FI'KI PAKAKA TENA'TO MANTA KUWALAKESA TITI KEBI WINA'TO JELENMINU.- *In jera pakajun fi'kilaka man shuwanki'to pan anolajoe fi'kichi junshi pilabi kirakajun junka merato nula panolajoe niyen kirake merajanunka seti'tukajun, sele merakajun, in fi'kika sele tan jinolajoe wa manta pilaka kirato junshi duke manta pila kirano minlabe nenalojae merachun aman uyankiran man shuwato selare'chun in jelenlachi mantaka jeralela miralasa.*

JERALELA SETI'TUKAJUN: *Juni panshile jeralela seti'la ti'juna in manta pilaka junojoe ke'tsa bolon junshi manka fe komunabi chuminla in pana kajun fi'kika munati'tuminla, juni inla tsankena manta talae pila kino junshi junbi pano niyai'to talatusa tinanunka manta tanlabe pano lajoe miralasa: 1. juni in pilaka kirawonolajoe jelen kiraminda manta tanlachi. 2. Tsankena in pilabi chu'tenolajoe tile junshi 3. niyake yu'kapiyareno jonunka jelenka.*

MANTA KUWANO JELENBI TITI KEBI WISA.-*Junin panshile Jeralale komunabi chuminla jelenka talakebi wisa munatilati'tuna, jamobi mantaminla sele tenka ka'to in manta kuwanolaje, sele manaman tenpa'to kirarakajun jeralelaka bolon shuwato junshi krikajun uyan minu niyen kiraketi komulaka pe ayudaichike kirakajun jelen taminka yu'kapiye'tumina.*

Juni in manta lonojoe junshi Jelen Manta tanlachi tedebe ra'e in pila selosa.

PALU TE'PA

PAN A'TO KIRAKAJUN JERALEKA JELENCHI MANTA TENCHI

MAN DE'KAN

JUNTELE PE RAKAJUN KELOLE JUNSHI KIRATO

Ayanka manta pila Ekuadoribi inte. 467.-*Tsantinae Jeralelaka pan ano manta joe jelen tenchi mantaka kirachu:*

1. *In proyectolaka kirano nishi duke junshi nashi yu'ka piyareno jonunka jelen postobi: junshi,*

2. In proyectobi joe ya titi kinakajunka kirade jino junshi moso shuka lareminla jelenka nanta yu'kapiyarelake'tusa.

Ayanka manta pila Ekuadoribi inte. 468.-Junte titi kika jola.-In pan akajun jeraleka jelenchi mantaka selarechun, proyecto kiminlachi titi kisa manta pila ka kuwatuminan sepa'tarenjoe junin jun tsankena panane in mantabi 467.

Ayanka manta pila Ekuadoribi inte. 469.- JUNTE PE RANOLAJOE KIRATO JERALELAKA I'SHAPAMIN MANTA BOLON.- In proyecto kinojun pilaka jeralelachi kirakeshi jelen kiramín manta yabi ranjoe, juntobi aman fi'ki pularenolajoe jeralelaka i'shapamin manta bolonchi juni inte manaman chudito kiranolajoe manta tantala in proyecto pilaka, junbi kale ranjoe jelen manta kirano min parejo nenamin in mantaka seke losa.

Junin inte panae Jeralelaka i'shapamin manta bolonbinechi manka manta tan kale ranjoe tinae in proyecto manta pilaka pe kirato, juni in fe'to panshile in manta pilaka sele kiratunarin ya chi'kan joe, proyectori jinonan joe telakisa manta e'toe.

Ayanka pila manta Ekuadoribi inte. 470.- Mo kemin pilaka kuwapokajun.- Juni in manta pilaka mo kemin jera kuwaponojoe in pilaka Jelen Manta kiramín bolonlachi. Jun tsankena in pila kemin fe'to pila te'paka junshi pila kidobi kirakenojoe aman fi'ki pularesakarinojoe televishunlabi junshi radiolabi yape jeralela miralasa in ka'san mantaka.

Juni in jelen manta pilaka komunalabi junshi tsa'chila kuwenta mi tanlachi to minu wina'to, in pilaka merawochun chilachi fi'kichi kikajunojoe inka tsanke jera sepa'tarenjoe mo in pilaka tu i'to kinamin.

In pila te'pa kidobi chilachi jelen tenchi manta panaminka merawochun in fi'kila ranolajoe:

- 1.Orara kirawono narin fi'kichi ti keno jonunka in proyectobi;
- 2.Ti jolala tule wino jonunka kirana'sa jeralelachi;
3. Nakan pila junbi panakajun niyakirake inojonunka jelenchi, soraminlachi, junshi jeralechinan; junshi,
- 4.Nakan pila manka niyakirake tikati kenojonunka jelenka talachun.

In proyecto pila jera kikajunka junshi pila te'pa aman fi'ki pularekajun pilalaka jera kirawonojoe Jelen Manta kiramínlachi kuwanojoe, juntobi aman jelenchi manta tenpanun postobi tsodinojoe in pila junka manaman chudito sele kiranolajoe jelen manta pila kirano minla.

PALU DE´KAN

PIYANLELAKA MERAKARENO OTIKEKAYAJUN JELENLACHI MANTA TENCHI MERACHUN JUNSHI TENPA´CHUN.

Ayanka manta pila Ekuadoribi inte. 471.- Piyanlelaka niyakeri pe otikekayajun merabi junshi tenpabi chilachi jelen tenchi manta selare´chun.- Jelen manta kiramín bolonla merawonolajoe jeralelachi in manta niyen tinanunka tsarshika sele miralasa junshi chilachi tenkayajunka in pilabi pe chu´tesakare´chun tsankena kirade jinano jolajoyoe in manta pila niyake selode jinakajunka.

Nishi uyankirake keno joe tinasati Ekuadori ayanka pilabi, jun parejunan mi´ka junojoe jeralelaka pan a´to kirano joe sele jelenka i´sha pano pudei´chun, i´tsanke kikajun:

1. Niyakeri sele merakareno

- a) **Bolon i´to merakarenun jola:** Niyakeri sele merasa karinojoe jelen manta kiramín bolonla in proyecto pila niyen tinanunka juni inte jelen manta kiramínka erenajoe mikarebi aman merawobi piyanlela miralasa junshi in pila keka junojoe tsa´chila kuwenta sonrano mi tanlachi mi junoka tenka´to, junin in fi´ki pularekaka jera merato parejo pe tenpalakesa selarechun in ka´san manta kenanun, tsankena jola junojoe jeralela i´to tempáno junshi yala tenkayajunka pano aman in fi´ki pakajunka jera merashi manka manka pakajunka, jununbi in fi´ki pularemin man tulankinojoe sele tu´kare´to miralasa jun tsankena komunerola pakajun fi´kika chu´tekanolajoe in manta pila kinakabi.

Juni ka´ke fi´ki pularina´to sele merawono joe niyake tan jinojonunka in proyectoka junshi tsankena panolajoe tile junshi nishi duke sei´tonkeno jonunka chilachi jelenka, tsankena fi´ki pularenoje tseban shuka larebi wina´to nishi duke junshi nashi sei´ton keno jonunka chilachi sonrano toka i´tsanke panamin fi´kila jera merawonojale, in mantalaka jera bolon shuwato fi´ki pulareno pan ano ma ka fe´tusanan.

- b) **Moti junshi tileti kiralakesa:** In fi´ki pulareminse kirano pode ino la joe piyanlela junshi jeralelanan in proyecto tenchi, ya ti kinakajun mirachun junte kirano junshi pano podeinojoe.
- c) **Kirawomin Fi´ki:** Inse fi´ki polare nolajoe jelen tenchi, in fi´ki polarechun joe (15) minuto wan ino joe, junshi (30) minuto waino podeino joe. In kirawomin. In fi´kika polareno jolajoe kirawominse jun tsankena uyan pila kiranunse inla manta kuwalaka Jelenka Mantaminla junshi jayakeminla; in fi´kika polareno jolae asamblealabi mijolajosa, miide jilaisa, manchi, manchi merato nenakajun tenpa´to. In kirawomin fi´kika polarenojoe proyecto tanjimin, ya ti kinaka junka kirade ji´chun inte merakarenajoe Jelen Manta Fi´kika junin Jelen Manta kiramín in titi kenakajun pilaka kirato man de´kan pulareminjoe in proyecto kemin tu´kachi, juni in kirawomin fi´kika jera kiramín sejoeke manta kuwachun.

d) **Inte pila te`paka kuwapomin joe jelen kiraminalachi:** Juni proyecto kemin jera fi`kika nashirin shuwakajun kuwaminjoe pila te`pabi junshi fi`ki pokayajun in mantaminla pan akajunka Jelen Manta kiraminal junshi wiyana manta kiraminal; in pilaka kuwaponojoe jeralelachi inla miralasa tile tile in proyectolaka ki`chun tilatinanunka, tsankena fi`ki pularenajoe manka kura junshi jeralelaka merawochun niyake puraide jinanunka in fi`ki pularekajun komuna kura pakajun fi`ki chu`teka.

e) **Jeralelachi fi`ki polaremin posto.-** Inte pila te`pa tsonojoe jeralaka in pila chu`tekajunka kirato miralasa, inbi panaminka sele mira`to tenpakajun komuna tenpe chila tala Junin inte Jelen Manta kiraminal in proyecto pilaka kiralakesa kuwanoje jun titikenojun poste chuminlachi junshi chu`tuminlachi, juni in pila kidobi titi jera panaminka junshi niyake in proyecto keno jonunka jera chunojoe, tsankena mirano podeinolajoe nishi duke, nashi, junshi ke`tsa tsanshi talakeno juna chilachi jelen postoka. Jun tsankena komuna to mapalaka jera kirawono jolajoe in fe`to proyecto kemin: In pila sele merawonajoe junshi i`tsanke jono joe A1.

Jeralelachi fi`ki pularenun posto junojoe jeralelachi in mantaka tsanke kirawonajoe jelen manta kiraminal bolonla junshi jeralela kiralakesa tsanshi jola ranojoe:

- e).1. Juni proyecto kika pila aman titi kenun postote duke junshi ke`tsa tsanshi sei`ton keno junan jelenka sele mirachun, in pila kirano jola ranojoe chunka junpalu ma (14): junshi,
- e).2. Proyecto pila junshi titi kekajun jelenbi, tseban shuka lareminla tenchi manta pila kirano nishi nashi sei`ton kenonjonunka chilachi toka, juni in fi`kika sele mira`chun ranojoe (10) chunka ma.

Manan jeralelachi fi`ki pulareno ma komunalabi junshi piyanlelachi in proyecto fi`ki rano jola joe:

e).3 In proyecto inojunka junshi titi kenonjonunka sele miranolajoyoe nishi duke junshi ke`tsa tsanshi yu`kapiyareno jonunka jun titi kenonjun postote mante ma ranoje; junshi,

e).4 In proyecto inojunka junshi titi kenonjonunka nashi yu`kapiyareno jonunka chilachi jelenka tseban shuka larebi wiminla, junin in fi`kika sele kirano podei`chun ranojoe peman ma.

Junin ma jonojoe in fi`kilaka junte raminka pulare`chun, kasele jelen postoka kirabi jitobi panolajoe.

Duke posto fi`ki polarenun lasaino joe jeralelachi pulare`chun, junte juno joe junshi titi keno duke lonan jun malate palu de`kanle titi keno pa`tichunae.

In malate posto lasaino joe fi`ki polare`chun, sa`pato ma junshi tominko maka jelare in fi`ki polare`to nena nolajoe, in ayanka pila mantaka kirato 473, yape jeralelanan parejo pe miralasa, juni in fi`kika pulareminla tsarshika merawono lajoe.

f) **Bolon shuwato fi`ki polareno jelen manta tenchi:** In pila fi`kise komunalabi fi`ki tanjinajoe in proyecto tenchi, junin panshile in proyecto fi`kika fe sonba lare`chun manaman merawonola joe komunerolaka jera bolon shuwato, in

pila fi'kika piyanlelachi ka merawo'tuminan, junin in fi'ki sele junarin in malate lasaino joe jeralelachi fi'ki pulareno posto. In pila selono joe panshile sele entende i'tuto, sele meraju'tuna, junte komunerola pilaka man ki'to kirawono lajoe jelen manta kirano minlabe.

2. Fi'ki polareno pila: *Tikati yuka piyare'tuminan Ayanka Pila Manta junshi Manta junla, junte joe fi'ki polareno jeralelachi tsankena pan anojoe jelen manta tenchi, inbi tsantinae:*

a) **Fi'ki polareno Piyanlelachi:** *Junin inse fi'ki polareno joe proyecto tenchi, ya titi kinanunka, inbi tsantinae:*

a.1) *Titi polenaminka fi'ki polaremin*

a.2) *Radiola;*

a.3) *Kirawomin;*

a. 4) *Merakari pajun;*

a.5) *Pila kido karakarinojoe in proyectoka miralasa, junin in pilaka chu'teno jolajoe mantamilachite, juntsankena Jelen Manta Kiraminla, junshi duke nenanun postote.*

In pila duke sele fi'ki tanojoe junshi kiranle ranojoe, intsanke ayanka jono joe aman polon kido;

a.6) *Moti kiralake'sa merakarino jola Jelen Manta kiraminlachi; junshi,*

a.7) *Moti junshi tileti kiralake'sa merakarino jola.*

b) **Manka kura fi'ki pulareno.-** *Fi'ki polareno jeralelachi, yape meralake'sa, junshi inka kiranolajoe:*

b.1) *To wi'ta Tsa'kuminla, in proyecto titi kinojun postote chuminla;*

b.2) *Komunalabi mantamin juminla in proyectoka, titi kenanunka junshi yalachi postote titi kenojuna;*

b.3) *Komuna, Komunalabi, tsa'chila kuwenta sonrano mi tanla, junshi wiyon bolonla, mantamin juminla in proyectoka, titi kenanunka kirano jolajoe; junshi,*

b. 4) *Mantamin unichi ko'tole raminla, provinshiabi mantaminla, mantote mantaminla, jun debi parrokiyalabi.*

Mankura fi'ki polarenojoe junshi man fi'kirin shuwato manta tanla merawonolajoe jeralelachinan, jeralenan bolon i'to tenpala kesa jelenka ishapa'chu junin pila kuwaponolajoe man fi'ki polarelakesa jeralelachi.

Fi'ki pulareno pilabi jeralelachi junshi manka kura pe jalai'sa pakajunbi junbi i'tsanke panojoe:

1. *Inte ma tu'kinolajoe numashi pa'tsa in fi'kila pulareno jonunka ti ora junshi numashi nechi bolon shuwato fi'ki pulareno ma jeralelachi;*

2. *Jelen Mantamin inse fi'ki polareno joe moti kiralake'sa merakarinose;*

3. *In Jelen kiraminci fi'ki polareno joe; Moti junshi tileti kiralake'sa in fi'ki merakarinose;*
4. *Inte pila manka joe jeralela bolon i'to kiralakesa jelen tenchi, junin inte ma,
posto, ora panolajoe bolon shuwachun;*
5. *In jolase joe fi'ki pulareno jeralela kiralakesa nula tenkayajun fi'kika miralasa junshi tsankenana pila po'to tsorebi jino postona junojoe;*
6. *Jun ma fekarin joe pano junshi kirakajun;*
7. *Ma joe pilalaka ka'chun, tsankena ya ti se e'tonati inte joe merachun junshi pila chu'tekachun; jungsi,*

Fi'ki pulareno joe tenrano wiyana pilalaka manka kura junshi fi'ki pularenunse moti kirano podei'sa.

Junin Jelen Manta Kiramin yala fi'ki pulareno jolajoe jeraleka otikekayajun jun parejo pe kirato nenanojoe in proyecto kemin fe'to. Tsankena in proyecto kemin fe'to tsarihika kiranojoe i'tsanke fi'ki pularenakajun seke losa jeralela tenchi.

3. Pan akajun

a) Bolon shuwato Pan akajun: *I'tsanke jeraleka bolon shuwano joe Jelen Manta Kiramin Bolonla yala pan anolajoe jeralelaka, junshi i'tsanke jera bolon shuwanojoe jelen manta fi'ki pularemin fe'to in pan anojoe junshi fi'ki pularennojoe komulabi yala tenkayajun junshi fi'ki pakajunka chu'tenolajununka junshi tsankena panojoe chu'teno e'tonan jelen manta tenchi tenpakajun fi'kika. Junin Jelen manta fi'ki pularemin fe'to manaman pan anojoe komunabi chuminlaka pila manta lare'chun yalachi to minu titi kebi wilai'sa manta kuwano jonunka, in jelen manta kiramin fe'to komunabi manta tanlabe kuwenta ki'to nenanojoe fi'ki pulare'to aman merato yala niyake tenkayajunka merato. Jun jera sele merakaritobi aman kiranolajoe jeralelai'to manta kuwano jonunka junshi kuwano i'tonunka yalachi jelen minu titi kebi wilai'sa, in niyake komula tenkayajunka Jelen Manta Kiramin bolonla yala inla pakajunka pilabi chu'teka'to tenpanolajoe juntobi ti manta junanti panolajoe.*

In proyecto kemin junshi jelen mantamin in fi'ki pularemin fe'to pe nenanolajoe jelen manta kiramin fe'tobe parejo, yala jera fi'ki pularenolajoe komunerolachi sele mi jolosa, chilachi jelen mantaka se lare'chun.

PEMAN DE'KAN

FI'KI, TU I'TO KIRANOLA JOE, NETANJI'TO JUNSHI KALA KUWANO IN PAN AKUJUN TITI KENAKA JELEN TENCHI.

Ayanka manta pila Ekuadoribi inte. 472.- Tsa'fiki panolajoe.- Fi'ki polareno jeralelachi jelen manta tenchi pan a'to titi keno in proyektoka, junin komula minu junshi tsa'chila kuwenta sonrano mi tanlachi fi'ki pulareno pa'tina in fi'ki pulareminla tsa fi'kichi panolajoe junshi fe'to fi'ki.

Inse fi'ki polarenun joe, junshi nashi ika pila te'pa in proyecto tenchi, junbi pilabi tsantinae ti kinaka junka, fe'to fi'kichi junshi tsa'fikichi.

Asamblea kasele jono joe, bolon shuwano jeralelaka, komunabi, tsankena wiyant sa'chi kuwenta sonrano mi tanlachi to minu titi kino pa'tina, inte munaranojoe tsa'fiki minka.

Ayanka manta pila Ekuadoribi inte. 473.- Mankura ti ke'to kiranola.- Jeralelan bolon ino jelen tenchi, in pilabi tsantinae komunabi chuminlaka kasele meranolajoe, ka proyecto wiya tusanan juntechiki kasele tenpano joe. Junin komunabi chuminla tsankena wiyant sa'chi mitanla kuwenta tobi chuminla, in proyecto duke respeta ino joe chilachi mi tano junshi bolon ino mika.

Ayanka manta pila Ekuadoribi inte. 474.- Tu i'to jeralela bolon ino lajoe jelen tenchi.-

Panshile tsa'chila jelen kuwenta keno josa bolon i'tuna jeralelana, fi'ki polareka josana, nishi paka josana jala i'tuna, junin inte jelen kuwenta kino juntechiki in fi'ki sepa'tarede jinanojoe: ya in fi'ki shupoleno joe, piya poleno e'toe in fi'ki, ya kuwenta dechi ino e'toe, tsankena jelen kiramini pila kino joe man fi'ki polarechun manta tanlachi.

Ayanka manta pila Ekuadoribi inte. 475.- Kala.- In pilabi tsantinae nishi mi'ka jonu jonan junshi nishi kala munarano jun junka bolon shuwato jelen fi'ki tenpachun, inbi fi'ki polareno junshi ya titi monareno jonan, juntsankena fi'ki polarechun in pilabi tsantinae, nishi kala munarano junka proyecto firutinojoe, jun ti kinaka junka. Junte proyektoka tanjimin sele tanjinojoe sele losa.

JUNPALU DE'KAN

I'TSANKE JUNOJOE JERALA PE NENAKAJUN PAN AKAJUN JELENCHI MANTA TENCHI

Ayanka manta pila Ekuadoribi inte 476.- I'tsanke junojoe jerala pe nenakajun pan akajun jelenchi manta tenchi. - Jeralela pe nenakajun junshi pan akajun in proyektola niyake juno jonunka aman nishi duke junshi ke'tsa tsanshi yu'kapiyareno juna chilachi jenlen postoka, tseban shukala larebi wiminlachi palu de'kan joe: 1. Fi'ki pularekajun, junshi,

2. Pan akajun.

Ayanka manta pila Ekuadoribi inte 477.- Fi'ki polareno jelen tenchi.- Inte pila kika junka man kuwaponu joe jelen kiramini, in pila kikajun proyechochi selono joe ya seke

titi kekajona junte manta kuwano lajoe ya in proyecto, wiyen titi kenojunla; in fi'kika man polareno joe nulachi man kirasa, i'tsan tinae in pila manta junbi.

Ayanka manta pila Ekuadoribi in jolale tsantinae 478.- Ka'ke paano lajoe jelen tenchi jeralelabe.- Kuwenta kasele keno joe palu nan chinechi jelenka kiraminda, juni inte pano joe junshi ya ti se'eton kina kajunka pano joe, inbi nan tsantinae manta pila kuwachun yape jelenbi jayakelakesa. In pila tsantinae jeralelanan tenka kano lajoe jelen tenchi.

MANTE DE'KAN

FI'KI POLARENU

Ayanka manta pila Ekuadoribi inte. 479.-Fi'ki pulareno.- Juni fi'ki pularenojoe in pila fi'kilaka merawoto inbi tsatiane:

1. *Fi'ki pulareno niyake in proyektola juno jonunka junshi titi kenolajun chilachi jelenbi, tsankena mira'chun nishi duke junshi ke'tsa tsanshi yu'piyarenojun jelen postoka.*
2. *Fi'ki pulareno niyake in proyektola juno jonunka junshi titi kenolajun aman nishi nashirin yuka piyareno jun chilachi jelenka tseban shuka larebi wiminla.*

Ayanka manta pila Ekuadoribi inte. 480.- Proyecto fi'ki polareno, tikina kajunka mira'chun niyake sei'ton keno jona junshi nanta yu'kapiyare'tuno juna chilachi jelenka.- In pilaka jelen mantamila kasele kiranolajoe proyecto ti kinanunka duke junshi ke'tsa tsanshi yu'kapiyareno juna aman tsankena nanta yu'kapiyareno i'tona jelenka i; inbi pan anolajoe jera pila tanunka jelenbi wi'chun, manta pilabi tsantiane, junbi aman panolajoe jelen manta kiraminda;

Ayanka manta pila Ekuadoribi inte. 481.-Jera sepa'tarekajun fi'ki pularebi wi'chun.- Fi'ki pulareno jun fe'to in proyektolaka kirano min komunalaka winojoe fi'ki pularebi junshi merawobi niyake titi keno jonunka junshi min jo'chun niyake junshi nishi duke junshi ke'tsa tsanshi yu'kapiyareno jona chilachi jelenka, juni in fe'to(3) peman ma tanojoe tsanke jera sepa'tare'chun Jelen Manta Kiramin Bolon in mantaka kuwalenechi, jun tsankena sepa'tarenojoe man proyecto fi'kika nashirin yu'kapiyarenojun titi kenojun tseban shuka larebi wiminla in fi'ki pilaka sepa'tarechun palu marin tanojoe, i'tsanke jera sekajun pilabe komuna tenpe fi'ki pularebi winojoe.

Ayanka manta pila Ekuadoribi inte. 481.1.- Kasele kiranun.- Inte proyecto kemin fe'to winojoe komunalaka titi keno jun posto minu junin fi'ki jera layanojoe junshi kiranojoe niyake fe sele fi'ki fesakarino jonunka in jelenchi mantaka miralasa:juntsankena in fe'to jera kiraka'to majanojoe niyake komunala junshi chila tsa'chila kuwenta sonrano mi tabla bolon i'to chulanunka. In fe'to jelen postoka kirano joe junshi min janojoe tile titi kenojuna junshi niyake sei'ton fekarino juna jelenka, in manta jelen tenchi kuwenta kenaka sele kirato ke'chun.

Kasele fi'ki pularenojoe in proyektoka tenchi junshi titi keno jonunka, nishi duke junshi ke'tsa tsanshi yu'piyareno juna jelen postoka, junin in fi'kika mera kawo'chun (7) sheyete ma taé, nashirin yu'kapiyareno jun proyecto junshi titi kenojun chilachi jelenbi tseban shuka larebi wiminla fi'kika merawo'chun (5) mante ma tsanshi tanojoe. Merakawono jolajoe in fi'kika komunabi manta tanlachi pularenojoe jun tsankena

manto tote manta tanlachi. Junin jelen fi'ki pularemin fe'to in titi kikajunlaka tenranjoe:

1. Jera pan akanojoe junshi miranojoe mo tsakumin jununka aman nishi komunala jun keloka ralana, i'tsanke sele mirachun jun postote nishi yu'kapiyareno jonunka in proyecto titi kekajun;
2. Tsankena miranojoe jeralela tenchi, i'shaimin bolonla nishi jola jonunka jun kelote, jun tsankena tsa'chila kuwenta mi tanla, i'hspamin bolonla, jun kelote sonraminlaka piyanlelaka jera merawonolajoe, junshi pe otikekanolajoe tenpachun yalachi fi'kika merachun in jelen manta tenchi;
3. Mirakajun jun pilabi panamin fi'kika kirakajun nun sei'to nanti yaka fe sele tenpakajun bolon i'to tsarshika mira'chun in fi'kika merawono mate junshi orara min jo'chun in jelen manta pilaka jeralelachi kirawono maka;
4. Itsanke fi'ki polareka, paa'kajun tsarshike se joe, ya jeralelanan miralasa jelen tenchi, tsankena komuna, mantobi mantaminlabe palu nantalaná kuwenta keno la joe, ya tile proyecto rano junan;
5. Titi kenolajoe komuna mantamilabe, mantote manta tanla in proyecto tenchi, ya ti kenano mirachun; junbi posto, ma, ora, junshi ka josanan tenpa'to kareno joe, juntsankena inbi rano joe, tsa'fiki min panshile munaralanan, inbi fi'ki polareno joe;
6. Fi'ki kano lajoe, komuna mantaminlabe junshi mantobi mantatanlabe, itsanke fi'ki ka'to selonjoe komunalachi junshi pan a'to.

Debi kirabi jika, jelen kiramín fe'to in pila mantaka jera sepa'tarenjoe (3) peman mate, proyecto tenchi, ti kenanunka junshi nishi duke junshi ke'tsa tsanshi yu'kapiyarenojún jelenka; junshi, inte tsantinae nashirin yu'kapiyarenojún jumin proyechochi (2) palu ma taé; junin inbi jino joe pila junshi fi'ki pokayajun foto, wiyán pila juminla jeraka kirawono joe.

In pilaka Mantamin lachi polarenjoe junbi jeralela paa'nola joe; junin in fi'ka proyecto tenchi (3) peman mate polareno joe, ti kenanoka mirachun tsankena nishi duke yu'kapiyareno junan junshi ke'tsa tsanshi in proyecto; junshi nashirin yu'kapiyaremin jumin proyechochi (2) palu ma taé; junin inte fi'ki pularemin mitano joe.

Kasele kirabi jika fi'ki layakaka pe chu'teno joe in pilabi junshi manan pila kinolajoe jeralelachi jelen manta tenchi, junbi pila, fotola kareno joe tsana pananunka mii'chun.

Sele fi'ki polare'tuna komunabi mantaminla, in proyecto kemin fe'tochi titi palu bolon i'to kenojunka jun parejo ki'tuto in manta panaminka meratu'to, junin panshile nunanti kuwenta kino bolon shuwano te i'tuna, in proyecto arajino e'toe, jinona jono joe.

Ayanka manta pila Ekuadoribi inte. 481.2.-Polareno fi'ki.- Fi'ki polareno junshi paano jelen kiramilachi, junin polareno fi'ki ka'sele jino joe kirabi.

Mantaminla otikano joe jeralelaka fi'ki polare, paa'no, junin inte proyecto ka ji'tusana yu'kapiyarebi jelenka pila kasele jonojoe jera sepa'tarika, ya ti kinanunka, nishi duke junshi ketsa tsanshi yu'kapiyareno jonunka; junshi, nashirin yu'kapiyareno juminlachi.

Fi'ki polareno proyecto tenchi; ti kenakajun junshi nishi duke junshi ke'tsa tsanshi yu'kapiyareno juna in proyecto, in ma taé (7) shete ma; nashirin yu'kapiyarenojun proyecto juminchi (5) mante ma joe; inka jelen mantaminla pila polarenolajoe jeralelachi paa'to.

Ayanka manta pila Ekuadoribi inte. 481.3.- Kino junshi fi'ki polareno.- Kasele fi'ki polareno joe, jeralelachi junte kirabi jin, junshi postote chuminlaka, junbi pila jelen juminlaka, junte in pila selono joe in proyectochi, titi kenano, junte jerale komunala miralasa fi'ki polaren junshi Komuna kura kuwenta kin, tsankena tenpa.

Ayanka manta pila Ekuadoribi inte. 481.4.- Inte pila chutekano joe.- Jelen kiramín manta tan, inbi tsantinae pila chu'tekano joe mo pe merabi jaminka ya'chi mumun pe rasa, tsanke jera pila chu'teno joe kajusanan kirabi jimín fe'to.

Ayanka manta pila Ekuadoribi inte. 481.5.- Pila jera kirakajun pa'ano junlaka.- Inte fe'to chuminla komunalabi chu'tutonan panshile ten i'to yalachi sonrano postote pe yu'kapiyareno joe ten i'to jelenbi titi keno juna, inla pila punolajoe pan a'to jun bolonbi pe rano podeilaisa, junin yala jun pilabi jera chu'tenolajoe niyai'to junshi niyake yalachi sonrano postoka sei'ton kenojonunka.

Junin pilaka kuwano pode inolajoe jelen Manta kiramín bolonlachi, tsankena jeralela tenchi i'shaimin bolonlachi, juntonan pilaka kuwanolajoe in jelen manta pila fi'ki, ka puletusana.

In pilaka seke kilake'tunan niyake ti jera pan anaminka kirakelake'tunan, junin itsanke sele kika e'tonan pokanolai'toe yala pan anaminka.

In pila pukajunka Jelen Manta Tan Bolonla chudito jera kiranolajoe, wiyán manta tanlabe junshi pakajun fi'kila kirano jolate.

Ayanka manta pila Ekuadoribi inte. 481.6.- Pa'aka junshi kiraka jun.- Pa'aka junshi kiraka jun, in fi'ki jerate rano joe, jun tsankena inbi:

1. Kuwenta kika jun komunabi pila;
2. Pila chu'teka jun paaka, junshi kiraka jun in fi'ki jeralachi merawoka;
3. Pila paaka, junshi kiraka inse fi'ki pulareno pode ino joe;
4. Pila paaka, junshi kiraka, fi'ki polare nunse junbi tsantinae fi'ki pularekajun pilaka pe pularesa panae; junshi,
5. Wiyán fi'ki polare nunse, jun tsankena kirano joe, niyake merano podeinolajuna in fi'kika.

Ayanka Manta pila Ekuadoribi inte. 481.7.- Pila chu'tekayajunka fi'ki pulerano jola. Piyanlelachi fi'ki pulareno jola jera pulenushile, jelen manta fi'ki pularemin fe'to pila chu'tekajun fi'kika pularenojoe, jeralela panaminka merato pila chu'tekajunka jelenchi manta tenchi. Junin wa proyecto duke junshi ketsa tsanshi jelenka yu'kapiyarenojun pilaka kuwanojoe (7) sheyete ma fekarin; junshi nashirínke jelenka

talanojun proyecto tseban shuka larebi wiminla pila fi'kika kuwachun (5)mante ma fekarin. Junin in fi'ki pularemin pila intsanke juno joe:

- 1. Jeraka Pano;*
- 2. Manta jun;*
- 3. Titi kekajun;*
- 4. Pila chu'te'to niyake fi'ki pulareka junka junshi titi kekajunka;*
- 5. Pila chu'teka junka pila kidobi chu'teto man pularino titi pakajun fi'kilaka junshi titi kekaka;*
- 6. Pilabi kirawono tileti yu'kapireno pa'tinana jelenka;*
- 7. Debí tenkayajunka pano;*
- 8. Pila kikajun kirawono: pila kidobi, fi'ki panamin, kirawominbi pokayajun, fi'ki pularekajun pila kido, layaikalachi mumunla pila kidobi chu'tekajun, junshi uyan pilala;*
- 9. Marshikajun mo tu'ka jumin;junshi,*
- 10. (Pila chu'tekajun te'pa kirawono, in pila kikaka kirachun).*

In fi'ki pularekajun pilaka Jelen Manta Kiramin Bolonlachibi ranojoe, tsankena uyan manta tanla kale raminla in pilaka pe kiranano jolajoe; junin yala in pilaka jera kirato man panolajoe (3)peman ma taé, in fi'ki jonojoe duke junshi ke'tsa tsanshi yu'kapiyarenojun proyectolaka kirato; man nantala yu'kapiyareno i'ton proyectochi tseban shuka larebi wiminlachi (2) palu mate.

Junin manta tanla in pilaka jera kirashi in proyecto kemin fe'toka fi'ki man pularenojoe man mate.

Ayanka Manta pila Ekuadoribi inte. 481.8.- Inbi chutenolajoe pan akaka junshi paka.- *In pilabi tsantinae fi'ki polarino joe, miralasa in manta pila tsanke panae; ti kenanun proyecto ke'tsa junshi duke yu'kapiyareno juna, juni (5) mante ma taé; nashi jelenka yu'ka piyaremin proyecto tano joe (3) peman ma; jun tsanshite fi'ki pakajunka pilabi chu'teka tanojoe junshi, tsankena tenrano titi sele losa kala mi'chi inojonunka kirato.*

Junin in pilaka ta'to, junte jelen manta tanla junshi wiyam manta tanla, in pila jera tan joe jeralelachi fi'kika, paa'ka junka; inte nechí (5) mante ma tano joe in proyecto, titi kika jun kirachun, tsankena nishi ke'tsa, sonba juna in proyecto; in (3) peman ma taé proyecto, titi kekajun kirachun nishi nashi yu'kaperede jinanán; inbi jelen mantaminla pilaka kirano joe junshi fi'ki man polareno joe.

Panshile ti se e'tonan mantaminla junte ralaé, junin inbi tsantinae (5) mante ma proyecto taé, titi kenaka junka, nishi duke junshi ke'tsa tsanshi yu'kapiyareno jun josati; junshi (3) peman ma taé in proyecto, titi kekajun nishi nashirin yu'kapiyaremin josati in tseban shuka larebi wiminla.

In jelen pila jonun shile, kasele kirano jola joe, jelen mantaminla junshi wiyam mantaminla juni yala (5) mante ma taé in proyecto, ti kena kajun ke'tsa junshi duke yu'kapiyareno jona jelenka; in (3) peman ma taé in proyecto, titi kinano kirachun jun tsankena nashirin yu'kapiyaremin proyecto yala joe tseban shuka lareminla.

Panshile ti se e`ton kiraka junan, proyecto kelo ramin, titi kenakajun ketsa junshi dule yu`ka piyareno jona jelenka; junshi nashirin yu`kapiyaremin jelenka, yala (3) peman ma talaé fi`ki polareno junshi man seshuwano.

In fi`ki jerale kayajun tsankena kiraka jun, jelen manta tanla pano lajoe (5) mante ma talaé pano in proyecto, titi kenano junshi ke`tsa junshi duke yu`kapiyareno pa`tina jelen j; tsankena (3) peman ma taé in proyecto nishi nashirin yu`kapiyaremin proyecto tenchi pa`chun inla jolajoe tseban shuka larebi wiminla.

In debi pila joe jelenka kirachun, tsankena inte debi fi`ki polareno joe, junin kasele paano lajoe.

Proyecto kelole rami, titi kenano in kira tuka junan, jun tsankena kuwa potunan jun mate, in pila tsodino joe.

Komunabi chuminla palaki`tuna junshi kiralaki`tuna aman junbi pila po`tuna junte Jelen Manta tanla inbi manta pila panaminka kirato 481.7, panolajoe in fi`ki jera pularekajun ma jeraieke junin junte debi jonoe fi`ki pulareno jola jun jerainushile manta kuwajoe pan abi wilai`sa.

SU`TA DE`KAN

INTE PAA`NO.

Ayanka Manta pila Ekuadoribi inte. 481.9.-Kasele paano.- *Junin kasele paano joe, jelenka kiramín proyecto raminka, titi kinaka junka, nishi nashi junshi duke yu`kapiyareno juna jelenka tsankena ke`tsale josati, in (5) mante ma taé; in proyecto kirachun nishi titi kenaka junka mitachun junte (2) palu ma taé; inte pila kino joe, junshi fi`ki polareno aman asambleabi paano jolajoe in proyecto tenchi sen junan, tsankena titi see`tonan, junin in mantabi tsantinae 472 junshi 473 in manta pilabi tsantinae.*

In pakajunka ma mikenolaje manta kuwakalenechi titi kelakesa jelen manta pilalaka jera sepa`taresa.

In pilaka kuwapono joe manta tanlachi, fi`ki polarelakesa; junin in proyecto (3) pema ma taé, titi kenaka junka nishi ke`tsa junshi duke yu`ka piyareno juna; tsankena nashi yu`kapiyaremin jelenka, in pilaka seke ki`chun (2) palu ma taé.

Ayanka Manta pila Ekuadoribi inte. 481.10.- Fi`ki polareno junshi paano.- *Fi`ki polareno junshi jeralelanan miralasa, paano tsankena jelentenchi, junin jelen mantaminla in pilaka kirano lajoe; in proyecto nishi ke`tsa junshi nishi duke jonunka jelenka yu`ka piyaremin, in (5) mante ma taé; nashirin jelenka yu`ka pereminla (3) pema ma taé, in pila ma mika taé, pila polare kalenechi in pilaka polareno joe jelen kiramín fe`to.*

Ayanka Manta pila Ekuadoribi inte. 481.11.- Komunabi asamblea keno pa`ano.- *Kasele pila polarekalenechi, junte rano joe jelen kiramín jun tsankena komunabi chuminla junte pe rano lajoe, juni junte komunabi tenpanolajoe junshi ma, posto, junshi*

ora pano la joe, in fi'ki polarenunbi. Junin in jelen manta proyecto kemin manta e'toe komunabi rano, inte tenpanolajoe komunabi chumintala.

Komunabi asambleabi in minuka tanjino joe:

1. Pila chu'tekano joe kasele: mumun, cédula, komuna posto; firma keno joe junshi temishuchi firma chu'teno joe;
2. Laya ika junla asambleabi;
3. Jelen kiramin fe'to, in kuwenta kino joe asambleabi, inte pano joe asambleaka jaminla (titi keno, niyake rano jona, nishi pano jona, sele pano, junshi wiyanla) tsankena; inte pilaka leto kirano joe;
4. In pila fi'ki jelen tenchi joe, inbi taé ti kirakajun junshi pakajun tsanke fi'ki pokala jun;
5. Komunaka kasele paano lajoe jelen tenchi in pila sen juna.

In pila jelen tenchi kirawono joe kasele, inte jelen kiramin fe'to pila kuwano joe, (2) ora kuwano manta joe, ya ti se e'tonanti man seke lakesa.

In jola kuwakajun jerainushile, pan akajun bolonlabinechi paluka tsa'chilachi manta kuwanoje yala palake'sa jeralelatenchi tenka kaya junka seten janunka junshi setenja'tuna jelenlaka talakebi wisa manta kuwano e'tonan. Junin in pakajunka jerala man fi'kirin tanolajoe junshi tsankena panolajoe yala tenka yajunka meralake'sa; in tsanke pakajun fi'ki laya i'to pila mantabi chu'teka purainoje; junshi.

6. Junin in jera pakajun fi'kika manaman merawonajoe jeralelachi niyake purainunka junshi in manta pilabi marshikajun purainojoe.

Ayanka manta pila Ekuadoribi inte. 481.-Fi'ki pulareno pila chu'tekajunka jelenlachi manta tenchi i'shapachun.-Jeralelaka bolonshuwato pan akajun ma jerainushile, jelen manta fi'ki pulare'to nenamin fe'to, pila chu'tenoje fi'ki pulare'chun niyake pulekajunka in pan a'to junshi fi'ki pularekajun nenakajun jola, junin proyectola duke junshi ke'tsa tsanshi yu'kapiyarenajun proyecto tenchi jera in pilaka sepa'tarechun (5)mante ma tanojoe; junshi nalan proyecto nanta yu'kapiyare'tunajun proyecto tseban shuka lerebi wiminlachi in pilaka sepa'tarechun palu ma shirin tanojoe.

F'ki pulareno jun pila in fi'kilaka tanojoe:

1. Jeraka pano;
2. Manta jun;
3. Titi kikajun;
4. Pila pularekajun kido jeralelaka;
5. Pila chu'tekajun man sekede jino jeralela pakaka bolon ino mate;
6. Debi tenkayajunka pano;

7. *Marshikajun mo tu'ka jumin;junshi,*
8. *(Pila chu'tekajun te'pa kirawono, in pila kikaka kirachun).*

Junin in fi'ki pulareka pila manta tanla kiraminci tedebi ranojoe.

Ayanka manta pila Ekuadoribi inte. 481.13.-In pila seloka junshi fi'ki pulareka pila chu'tekajunka kirano jelenchi manta tenchi pan akajunka.- *Mantaminla junshi wiyen mantatanla, in pila junbi; in proyektobi, titi kenanunka nishi junan ke'tsa junshi sonba yu'kaperemin in ma tano joe (7) shiyete ma; junshi, nashirin yu'pa peremin jelenlaka ma talae (5) mante ma, junin in fi'kika mantamilachi kuwano joe, in mantamin tsan tino joe, se joe in pila, debi tsantiane jeralelabe paano lajoe.*

Komunabi chuminla sejoe tilatinan, jelenchi manta tenchi; mantaminla junshi wiyen mantatanla, intsantinojoe in fekarin joe junshi ya pilaka manta tanlachi kuwaponojoe yape tanjilaisa jelen tenchi, in manta jun pila joe.

Juni panshile jeralela bolon i'to in pan anakajunka munatlati'tuna jelenbi titi ke'chun manta kuwatusa tilatina yala kiranolajoe niyaketoti sepa'tarechike. Manan jelenbi titi kebi wisa manta juminka setilatina sele kirato in minuka sepa'tarenolajoe nanta yu'kapiyaretuchike junshi tsankenape kiranolajoe jun proyektobi titi pekilake'sa jayano posto kuwakajun tsanke sele sonrano podei'sa komunabi chuminla; junin junte in fi'ki pularekajunka man seshuwashi in pan akajun jeraleka jelenchi mantaka selare'chun inte jerainojoe.

Ayanka manta pila Ekuadoribi inte. 5.-In pila walada jino joe IV "JERALENA BOLON INO JELEN TENCHI", IN PILA PAMAN TE'PABI, inbi tsatinae:

"IN PILA IV

KIRANANO JUNSHI NE TANJINO JELEN SEN JOSA"

Inte. 6.- In fi'kika pe punojoe in mantabi Reglamento al Código Orgánico del Ambiente in MANTA FI'KIKA JERALELA MERANOLAJOE

PALU CHUNKA SHIYETEKÁ.- Proyecto kiramín fe'to, titi kenano junka, in fe'to jelen manta tanlabe pe kirano joe, jerale titi kenasa yape jeralelan pe jola josa.

PALU CHUNKA OCHUKA.- Panshile inbi titi kekajun seke lo'tuna fe ma kuwanojoe inka sele man tui'to kirachun titi kenojun postote. Junin manaman pan anolajoe jeralelaka jelenchi mantaka sele kirachun in mantabi tsantinae Decreto.

PALU CHUNKA NUEKA.- Jlenka kirachun munarano e'toe jeralelaka paano; inte pila te'pa fi'kika kareno joe ya miralasa jeralela in proyecto tenchi, titi kenanunka junin in pilabi pe chu'teno lajoe.

PEMAN CHUNKA.- In proyecto, titi kenaka in pila manta junbi rano joe 448 Reglamento al Código Orgánico del Ambiente, jeralala junshi jelen tenchi paano manta joe, junte tsantinae kasele jelenka kirato.

PEMAN CHUNKA MANKA.- Jelen bi titi kebi wilai'sa manta kuwakajun pila tsomin in manta ka lo'tusanan kuwakajun tsainan mate in mantanan ka joe; juni in pila te'pabi pe rano e'toe inbi tsantinae IV.

Ayanka manta pila Ekuadoribi inte. 7.-In pila pe jino joe Reglamento al Código Orgánico del Ambiente inbi TSANTINAE

NUWE CHUNKA.- In Ministerio del Ambiente, Agua y Transición Ecológica, junshi Ministerio del Trabajo juntsankena Ministerio de Economía y Finanzas, in la ma taé (60) suta chunka ma, junin ma mika taé in pilaka jonun lenechi, jun in manta joe, manta tanla junshi kala kiramínla junte fe jelen kiramín jayakimínlaka munarano joe i'tsantinae in pilabi.

CHUNKA.- Jelen mantaminla, mantote junshi provishiabi mantamila, yala inbi rano lajoe Sistema Único de Manejo Ambiental (SUMA), in la (90) nuwe chunka ma tano lajoe, in pila kasele ya tenpe kirano lajoe mii'chun nishi sejunan in pila junte mantaminla fi'ki polareno lajoe jeralalachi fi'kika in jelen tenchi paano. In pila seikafekarin, junin jelen mantaminla jayakemin manka tu'ka karenolajoe inka kiralakesa.

CHUNKA MANKA.-Jera royectola junshi titi kekajun jelenla duke junshi ke'tsa tsanshi yu'kapiyareno pa'tina jelen postoka junin ya pila inbi rae SISTEMA ÚNICO de MANEJO AMBIENTAL, juni in pe fekarin ranojoe 11 de octubre 2021 wa'ta, in pete manta larekajoe joe Corte Constitucional del Ecuador No. 22-18-IN/21 juni in mantaka kuwanojoe JELEN MANTA KIRAMIN BOLONLACHI, PI KIRAMIN AMAN TO AYANKA ISHAPAMINLACHI: in manta tanla jera ne tanjinolajoe pan a'to junshi fi'ki pulare'to piyanlelaka in tsainan manta juminka kirato.

CHUNKA PALU.- Jerale proyectola, titi kinano duke junshi ke'tsa tsanshi jelenka yu'ka piyaereno juna inbi chudino lajoe Sistema Único de Información Ambiental in pelenechi 12 de octubre de 2021, in mataka merato N°. 22-18-IN/21 in pilaka tsantinae Corte Constitucional del Ecuador, junte fi'ki polarenae in lachi Ministerio de Ambiente, Agua y Transición Ecológica el 11 de octubre del 2021, in pila tsantinae jeralalana junshi jelen tenchi paano manta joe.

CHUNKA PEMANKA.- Jerale proyectola, titi kinano junshi nishi ke'tsa junshi duke jonan jelenka yu'ka peremin inbi chudino lajoe Sistema Único de Información Ambiental in pelenechi 12 de octubre de 2021, in mataka merato N°. 22-18-IN/21 in pilaka in tsantinae

Corte Constitucional del Ecuador, junte fi'ki polarenae in lachi Ministerio de Ambiente, Agua y Transición Ecológica el 11 de octubre del 2021; junin in pila pakalenechi jelen mantaminla junshi wiyán manta tanla, tsantinae in manta pila junbi 470.

Proyecto fe'to kiramín, titi kenanunka, yala ma talae (10) chunka ma taé, in manta jokalenechi, pila kuwaponojoe jelen kiramín fe'to, jera pila laka; junshi in manta pilaka merano lajoe.

CHUNKA MANTEKA.- In manta lokalenechi jera proyectola junshi titi kenojun jelen postoka nanta yu'kapiyare'tuminan tseban shukala lerebi wiminla pudeinolajoe mohora titi ki'to kirano jun postobi in mantabi karai'to No. 1149-19-JP/21 del 10 de noviembre de 2021 y el Auto de aclaración y ampliación No. 1149-19-JP/21 21 de diciembre de 2021, Corte Constitucional del Ecuador, in Manta tan Bolonla porepa'tikalajoe in pila fi'kika poletusa in Sistema Único de Información Ambiental; Jelenchi mantaka selare'chun jeralebe tenpanolajoe junshi piyanlela pe nenano jolayoe in mantaka sele kirachun reglamentobi panaminka.

CHUNKA SU'TAKA.- Inte tsantinae (90) nuwe chunka ma taé, in pila manta lokalenechi, junin Jelen Mantamin inbi seno joe Sistema Único de Información Ambiental in pilabi IV in mantabi tsantinae.

Ayanka manta pila Ekuadoribi inte. 8.- Inte tsantinae in fi'kika piyarede inka junpalu pila fi'kika.

Ayanka manta pila Ekuadoribi inte. 9.- In pilabi tsantinae in pila fi'kika piyaresa:

“Paano junshi pano.- In proyectoka jeralei'to junte chuminla kiranola joe seke jinanunka”,

DEBI FI'KI TSANTINAE

In manka.-In manta Decreto fi'ki jeralelachi ranojoe juntsankena inbi kirano pudeinolajoe Registro Oficial.